

Manua le Kerisimasi ma le Tausaga Fou!

**Tesema 25, 2022
Saunoaga a le Kovana**

Ou te ofo alofa atu! E le faaititia lagona o alofaaga i lo tatou atunuu mai lava i tumutumu e oo i se aupito itiiti. Ae avea ia le gagana o le alofa e pei o la Paulo, e lautua ai mea uma, e avatu faafaigofie ai fo'i se feau i lenei tau o aso faamanatu ma magalo ai se tautalaga. O le a ou le apoapoina pa'ia faaleAtua, ma tulaga faalupelupeina o le faigamalo ma le atunuu. A'o faatasiasi aiga, uo fo'i ma e masani, e feofoofota'i le alofa, ou te talanoa atu ai i o'u alofaaga ia te oe Amerika Samoa, o si o'u aiga moni.

E talitonu, ua tatou lagona faatasi le pa'i mai o le feau o le Kerisimasi – O le Atua ua liutino ma avea ma tagata e pei o i tatou, ina ia faatāuaina lo tatou faatauvaa. Ua maua le avanoa e ta'ua ai tatou o Kerisiano ona o le Atua lea tatou te faamanatuina. I le ma lenei, ua toe o ni aso tatou taunuu i le laasaga tāua, o le faaopoopo mai o se tausaga fou tatou te galulue ai ma faia le finagalo o le Atua. Ae a toe tepa i le tausaga na savalia mai, e ofo le mafaufau i le tele o faamanuiaga sa tatou maua.

Faafetai tatalo, faafetai faanōnō manū i le Atua. E ui ina faamata'u mai mala faanatura ma le maliu faafuase'i, ae sa tumau le filemu i luga o o tatou motu iti ma le faatauvaa. E ui foi ina le aulia mai lenei aso e nisi e pele ia i tatou, ae o loo sapaia pea le to'atele i aao alofa o le Atua.

Faamalo le folau! Faafetai finafinai i soo se tiute ua tofia ai i tatou, i le malo poo pisinisi, ma o tatou aiga ma afio'aga, lea ua vaaia e sulu o le tino le faamaoni o lo outou soifua tautua ma le finafinai ia faia pea mea sili i lena sefululua masina na se'i mavae atu.

E momoli atu o ma'ua moomooga faatasi ma le Afioga i le Kovana Lutena ia Talauega Eleasalo Vaalele Ale ma o ma aiga – ina ia tatou maua se Kerisimasi fiafia ma se Tausaga Fou manua. O le tatalo mai le ta'ele o ma loto, Ia tumau le alofa lavea'i o le Atua ia i tatou uma, ma ia mamao ni mala e afe a'o ni gasegase o malo e pei o taua ua vesia ai atunuu i fafo. Ia tausia foi e le Atua le Malo Tele ua tatou faimalo ai, ma ia faia e ta'ita'i uma faai'uga tatau ina ia saogalemu o tatou atalii ma afafine e to'atele o loo iai i vaegaau a le Malo Tele.

Ia Faamanua le Atua i le tapua'iga a tina ma tama o loo malutia ai o tatou aiga. Ia iai le tofa loloto i ta'ita'i uma o le faigamalo, o e ua suafa matai ma avea ma ta'ita'i i aiga ma afio'aga, o ekalesia ma le latou galuega faifaipea i o tatou agaga. E oo lava i fanau iti, ia tofutofusia uma i le alofa o le Atua.

Ia le gata i lenei Kerisimasi ma le Tausaga Fou o le a aulia, a'o aso uma lava. Soifua.


LEMANU P. S. MAUGA
Kovana